



録
盦
先生
年
大



序

先生自通籍登仕途四十餘載跋歷中外文事武畧皆能以功名自顯而學問文章之業未嘗一日忘鞅掌之餘更勤著撰纂緝積至數篋迨七十歲乞身歸田又復兩入京師還主婁東敷文兩書院兼修志乘故前所著撰久欲詮次而未果及在敷文日漸耆乃亟請同志者考定編纂而春融堂集亦以次編成綜計先生編撰春融堂集而外若金石萃編琴畫樓詞鈔青浦詩傳湖海詩傳明詞綜國朝詞綜俱已剞劂行世其餘尚有四十餘種彙藏於家等身之富不足多矣今先生已歸道山諸同志請將年譜刻於詩文集之末以資讀者瀏覽錄譜寄示榮忝在館甥已將三紀先生事蹟固已熟志之而乾隆辛巳癸未丙戌間先生門下士景孝廉人龍嘗


敘先生籍貫履歷以爲譜越十餘年先生在蜀族弟啓焜又續譜之更十餘年今泉州太守王君紹蘭又爲增撰然此三本所載間有參差出入而各人紀載之法亦殊榮不自量竊欲合爲全譜以示來茲乃於公餘之暇詳悉考核釐爲三卷附諸集末其中稱謂皆以榮爲定蓋先生同朝之侶暨同學之士多與榮兩世科第親戚相關也昔唐李侍郎漢爲韓文公壻且出其門下今榮奉侍周旋日久固與受業者同而見聞親切較之前三君所紀爲詳將來徵文考獻知人論世或有取于此焉

賜進士出身浙江金華府知府前翰林院編修兼撰文苑實錄館纂修官子壻嚴榮謹序



顯考述庵府君遺事狀

府君自七十致仕迄今十有三載雖視聽日衰而精神如故自五月十二日偶患時瘧越三日霍然二十日瘧復作食飲漸減然猶令人誦所作詩文口授刪削至二十六日疾益劇氣逆上不能飲米瀦因言吾生平行事家光祿鳳嗜錢宮詹曉徵少同學長同朝晚歲先後同乞身往來無間知之最稔而兩君已歸道山今惟阮中丞伯元秦京尹小峴頗爲詳悉二君皆蓄道德能文章墓志神道碑當乞分任之以信今而傳後六月初三日適圓津禪院僧慧照覺銘來府君曰昔東坡在常州中暑暴下疾革時徑山僧惟琳來說偈居士云平生笑摩什神咒真浪出今師來正與惟琳同所謂不須著力吾自知之相與一笑而別初六夜數數問時刻雞初鳴日時



PI后缺

至矣遂溘然長逝嗚呼痛哉府君立朝行已功業文章已詳載年譜中遺命勿復作行述不孝奉侍無狀終天之恨百身莫贖惟念府君性情風概學問源流有年譜所未及載者若不詮次以傳則獲罪滋大因編錄所知仿柳子厚逸事狀一通不孝苦出餘生語無倫次惟冀當代大人先生垂覽焉先世居蘭溪自思岡公始遷青浦之珠街角鎮思岡公名列幾社著有樊圃誠語樊圃詩草沈文愨公輯之國朝詩別裁集採以入選先大夫不孝贈光祿大夫鴻遠公立身誠恕嘗擇經語十二條取史事附著之盧紹弓學士墓志以黃叔度徐孺子爲比府君仰承家學少自刻勵年甫冠先大夫卽世家中落事先大母陸太夫人錢太夫人宗族稱孝不屑屑問家人生產作固窮賦以見志通籍後名與朱竹君學

述庵先生年譜上

吳縣

嚴

瑞唐編



先生名昶字德甫號述庵又因有蘭泉書屋琴德居故時亦以爲號焉先世居浙江蘭溪縣高祖懋忠字思岡始遷江南松江青浦縣西珠街角鎮曾祖之輔字幼清 馳贈資政大夫大理寺卿 晉贈光祿大夫刑部右侍郎祖瑛字魯淵父士毅字鴻遠皆 敕贈文林郎內閣中書舍人再 贈奉直大夫吏部考功司主事三 贈資政大夫大理寺卿 晉贈光祿大夫刑部右侍郎曾祖母雷氏祖母沈氏嫡母陸氏生母錢氏皆 晉封至一品夫人三代事實詳馬庶常曾魯所撰行狀及盧學士文昭墓志錢少詹事大昕神道碑中

雍正二年甲辰先生以十一月二十二日未時生時光祿公
年四十有五尚乏嗣春游杭州禱於靈隱寺夢人授之蘭明
日市蘭以歸逾兩旬蘭茁笋二一才出土殞其一長尺五六
寸許葉森森如巨竹狀及夏沙燕栖於楹同窠而異穴人以
爲祥至冬陸太夫人孕男不育而錢太夫人生先生

三年乙巳二歲

四年丙午三歲

五年丁未四歲光祿公授以宋周伯弼所選三體詩兩月而
畢

六年戊申五歲讀楊用修廿一史彈詞粗知歷朝事及古今
名賢崖畧

七年己酉六歲少羸善病是年尤劇

八年庚戌七歲就傅從同邑姜受百秀才 鵬源 受業

九年辛亥八歲

十年壬子九歲

十一年癸丑十歲

十二年甲寅十一歲

十三年乙卯十二歲

乾隆元年丙辰十三歲從同邑胡墅東貢生 王道 受業時初

學制舉義矣先是光祿公撰集史記屈原以後迄於明季凡
正人君子一百二十人爲百世師錄塾中歸每日授二三十

行

二年丁巳十四歲

三年戊午十五歲從崑山蔡文舟貢生 龍 受業

四年己未十六歲光祿公年六十貢主

五年庚申十七歲從同邑陳穎傳貢生麟詩受業秋試於府

為知府山西劉君堯裔所知拔置第一

六年辛酉十八歲二月應院試學政工部侍郎桐城張公廷

孫以第一名入學先生先於蔡貢生館中得東野堂韓集歸

震川集張炎山中白雲詞讀而愛之至是乃始學為詩詞

七年壬戌十九歲秋游神余橫雲諸山汎泖湖作詩多效陶

謝王孟體同里張行人梁劇獎賞之

八年癸亥二十歲先生曾祖阡在吳縣靈巖山後硯山西獅

峯以春日祭掃遂游支硎光福石湖諸勝

九年甲子二十一歲正月娶鄒夫人夫人為宋龍圖閣直學

士鄒忠公裔申蕃先生維翰之女居元和縣章練塘其閑閑

世德詳無錫鄒氏家譜二月從光祿公游西湖入靈隱天竺

抵韜光寺得詩十數篇乃彙前所作編為蘭泉書屋集四月

光祿公病八月二十二日逝時先生侍疾日久哀勞彌甚瘡

刺交作十一月生子肇春

十年乙丑二十二歲正月肇春殤

十一年丙寅二十三歲十一月服除先生居喪讀禮不作詩

文

十二年丁卯二十四歲褚左峩秀才廷璋見先生詩詞屬先

生族兄鳳喈秀才鳴盛移書相贈三月在長洲謁蔣迪夫恭

業楊文叔繩武兩編修勸學古人以宋文憲為法八月應江

寧鄉試國子監祭酒尹公會一為學政錄科第三長洲吳企

晉教諭泰來來定交報罷後往宜興游西沈菴畫溪諸勝因

摹國山碑以歸金石之好蓋自此始

十三年戊辰二十五歲二月學政兵部侍郎莊公有恭歲試

取第六補增廣生乃與張策時秀才無純趙升之秀才文哲

凌叔子秀才應曾輩十六人為文酒之會三月游虞山還訪

陳見復進士祖范五月見惠定宇秀才棟因識沈冠雲貢生

形李客山布衣果定宇博通經術于漢學最深冠雲通三禮

又與客山竝以古文稱自是潛心經術吳下詩人年齒倍于

先生者亦多為忘年友雅爾哈善課所屬州縣諸

十四年己巳二十六歲巡撫宗室雅爾哈善課所屬州縣諸

生能文者取入紫陽書院肄業先生試第一監察御史王公

次山嶠為院長同院中如褚摺升秀才寅亮錢曉徵秀才大

昕曹來殷秀才仁虎皆以經術詩古文互相砥礪

十五年庚午二十七歲四月學政國子監祭酒蒲坂崔公紀

科試取第一補廩膳生五月禮部侍郎沈公歸愚德潛以年

八表 予告歸鳳喈曉徵來殷及先生皆游其門

十六年辛未二十八歲王公次山以病歸常熟沈公歸愚為

院長春二月 鑿輅南巡曉徵摺升獻賦 行在先生以病

未及與試秋沈公甄錄先生鳳喈企晉曉徵升之來殷及上

海黃芳亭孝廉文蓮詩為吳中七子詩選企晉別業遂初園

在木瀆擅花木水石之勝清瑤池館小查山閣尤幽秀先生

定宇鳳喈曉徵來殷及張古樵桐沙斗初維村諸公往游文

酒之盛為吳中數十年來所未有自庚午至是兩年詩編為

三泖漁莊集大曾清谷士下泰並凡二百四十餘人

皇太后六十萬壽以春二月舉鄉試正月偕企晉赴金陵寶
山朱觀展孝廉桓復大會諸名士于秦淮凡二百四十餘人

為江南友聲二集先生與焉四月銅山周貢生毓崙以經學

薦抵吳來相見九月莊公復任學政歲試第六試詩賦第一

十八年癸酉三十歲先生館于朱適庭上舍昂疎雨樓其弟

肅徵莅恭子孟容履長仲霖用雨皆受業三月學政通政使

寧化雷公鏞科試第三試詩賦經學皆第一七月赴金陵與

陶蘅川秀才湘嚴東有秀才長明及程魚門秀才晉芳定交

鄉試中式第十一名正考官內閣學士禮部侍郎蒙古夢公

麟副考官翰林院檢討定興王公太岳同考官如臯縣知縣

海寧陳公琨十一月由鎮江揚州至如臯陳公以公事出借

族弟南明啓焜留於署者十餘日邑中姜靜寧孝廉恭

篤周貢生增祐輩皆舊交同游水繪園弔辟疆遺跡為詩以

紀其事時夢公已任學政十二月還至江陰往謁公出午塘

集屬序且詢吳下諸文士先生以企晉升之策時東有告焉

江陰翁霽堂徵君照年七十餘夙與先生交好至是訪之盤

花旋竹兩日而行是冬刻鄭學齋集

十九年甲戌三十一歲正月北上二月抵京師禮部侍郎無

錫秦公蕙田方仿徐氏讀禮通考之例纂五禮通考屬先生

修吉禮三月會試內閣學士鄒公一桂知貢舉正考官大學

士海寧陳公世倌副考官禮部侍郎滿洲介公福內閣學士

武進錢公維城榜發先生中二十四名鳳喙曉徵皆中式同

考官為給事中臨川李公友棠時先生名滿輦下秀水諸襄

七贊善錦嘉興鄭炳也編修虎文保昌胡靜園御史定以文

章風節名皆愛重先生而內閣學士仁和金公德瑛尤數招往談讌因與秀水錢坤一編修載王受銘舍人又曾鉛山蔣心餘孝廉士銓友善四月試於太和殿讀卷官為大學士滿洲來公保大學士溧陽史公貽直協辦大學士刑部尚書滿洲阿公克敦協辦大學士戶部尚書常熟蔣公溥刑部尚書諸城劉公統勳戶部侍郎武進劉公綸兵部侍郎安溪李公清芬刑部侍郎漳州蔡公新工部侍郎新建裘公日修及陳介錢三公先生以莊君培因榜二甲第七名成進士又朝考於保和殿欽定第三名因驗看揀選入三等不得用歸本班候銓選仍寓秦氏味經軒月餘山東吳凌雲運使士功以書幣來請乃赴濟南運使使其子廷韓玉綸及楊星標懷棟受業署中經史頗具又濟南山水名天下先生益殫

心經術暇日偕其徒游大明湖鵝華橋柳絮諸泉之勝光祿寺卿沈公子大起元為灤源書院院長號善言易者見先生如夙契也十月以辭家久歸省抵蘇州而陸太夫人已于是月二十四日逝矣先生既痛不能侍疾又不及躬視含殮終天之恨慟不欲生云是年詩編為履二齋集二十年乙亥三十二歲居憂夢公約往校文兩淮盧雅雨運使見曾邀往揚州皆不赴吳縣汪心揆秀才為善偕其弟應奎真受業於先生沈公歸愚所刻七子詩選流傳日本大學頭默真迦兒而嗜之附書番舶以上沈公又每人寄憶一詩寄先生云新吟兩卷重麻沙海雨江風入齒牙洵有詩書歸典則偶將烟月鬪芳華人如句曲陶宏景詞比新宮蔡少霞我欲據梧同詠嘯滄溟何處覓靈槎

二十一年丙子三十三歲冬將釋服乃赴揚州運使之招

二十二年丁丑三十四歲運使使其子及孫受業時程午橋

編修夢星馬秋玉同知日瑄佩兮日璐兩兄弟江賓谷貢生

昱于九兩兄弟及其家橙里昉聖言炎汪對琴秀才棟臨

潼張榆山貢生四科為地主酒坐詩場于斯為盛二月鑿

輅南巡 召試獻賦諸生兵部侍郎李公因培任學政以先

生所獻迎 鑿詩賦進 呈三月 召至江寧試精理亦道

心賦鴻漸于達詩經義制事異同論 命乞養在籍協辦大

學士吏部尚書錢塘梁公詩正兩江總督滿洲尹公繼善左

副都御史諸城竇公光翬閱卷 欽定一等第一 賜內閣

中書舍人即用同 賜官者為曹仁虎韋謙恆吳省欽褚廷

璋吳寬徐曰璉凡七人四月歸里六月復往江寧寓袁子才

明府枚隨園見總督尹公時程綿莊徵士廷祥通易頗不喜

象數先生與之申鄭虞之說無以難也訪新建呂青陽布衣

泰泰得其十學薪傳以歸八月赴錢塘謁梁公於里第天台齊

次風侍郎召南方為敷文院長杭大宗編修世駿亦家居先

生往見之佛者讓山象玉居萬峯山房大恆明中居淨慈寺

以詩畫名先生過精舍盤旋移日居二旬至吳下寓蘋花水

閣歸九月鄒夫人病瘵日久不離牀蓐扶掖湯藥左右需人

錢太夫人謀置筵室以供指使於是納許孺人踰月將為北

行計因往江陰辭學政李公遂出大江泝圖山而下過焦山

鐵機上人留信宿去抵揚州仍寓運使署中而紅橋篠園平

山堂亭榭花木風景益勝運使屬撰紅橋小志以紀其盛焉

是年在揚州度歲

二十三年戊寅三十五歲正月無錫顧震滄司業棟高來揚

州以所註尚書屬考定居數日東還奉錢太夫人北行四月

聞座主陳公子告南還薨于途次謚文勤五月抵京師寓

椿樹衢衢八月夢公以兵部侍郎卒于位梁元穎侍講同書

梁公長君也工詩善書法性幽澹不妄與人往還而獨與先

生甚密十一月補授中書編丁丑戊寅詩為述庵集

二十四年己卯三十六歲先是梁公以工部尚書召入都

旋改兵部二月招先生館于邸第校勘續文獻通考大學士

溧陽史公常熟蔣公皆以國士相待是秋回部平奉旨加

一級都中以經術文章名者莊方耕閣學存與申拂珊府丞

甫盧紹弓中允文昭楊二思編修述曾紀曉嵐編修時朱美

叔編修筠石君珪馮君弼寺丞廷丞祝豫堂舍人維詰吳荀

叔舍人煥皆來數晨夕連茵接軫聞者慕之四月考試差于

乾清宮閣部翰詹科道各衙門進士出身者凡一百五十

餘人

上定先生第一八月充順天鄉試同考官正考官錢塘梁公

副考官左都御史滿洲觀公保先生分校詩經五房得彭光

斗吳璜夢吉等十一人九月協辦內閣侍讀十一月直軍機

房是月詔修通鑑輯覽以先生為纂修官

二十五年庚辰三十七歲

皇太后萬壽開科四月試各衙門諸臣于圓明園正大光

明殿太倉邵鴻箴編修嗣宗第一嘉興謝崑城編修壻次之

先生第三八月復充順天鄉試同考官正考官戶部尚書武

進劉公綸副考官禮部侍郎介公福先生分校詩經四房得

申兆定白麟等十人是月初七日鄒夫人卒年三十六歲十月遷寓教子衙衙趙給事吉士寄園故址屋內古木八九章

皆數百年物先生署其室曰蒲褐山房日聞思精舍境地深靚市塵隔絕先後與趙雲松編修翼翁振三編修方綱及族

子蓬心宸為鄰蓬心麓臺侍郎原祁曾孫為作圖以贈良朋

萃止黃葉盈除爐香斷續儵然如在世外也先生作八絕句

以紀之後門人烏程張漢宣彤書之而刻置於壁十一月

萬壽恩詔加一級 詔輯同文志以蒙古額魯特回部三種

字合於國語證以漢字凡天地山川器物等名用三合切其

音又為註釋而疏通之先生兼充纂修官時秀水尚書錢公

陳羣以祝

釐人都造訪寓齋輒譚藝竟日

二十六年辛巳三十八歲春三月充會試同考官正考官諸

城劉公統勳副考官戶部侍郎金壇于公敏中及觀公保先

生分校詩經三房得孫嘉樂馬曾魯吳興宗黃楷等十一人

是年於會試薦卷中錄其佳者為中書舍人學正等官得沈

世燾等四人而吳廷韓汪心揆亦成進士授庶吉士五月京

察一等奉 旨加一級七月心揆歿於京邸是年春納陸孺

人

二十七年壬午三十九歲三月座主介公卒四月復試各衙

門諸臣于 乾清宮翁振三編修第一張懷月舍人霽次之

先生第三五月生女粹卿名慧仁陸孺人出八月又充順天

鄉試同考官正考官梁公詩正副考官觀公保先生分校尚

書三房得景人龍施朝榦達勇等十一人冬十二月大學士

公傳恆奏請以主事用刑部尚書舒公赫德請爲其屬時人士造謁者甚衆而先生閑靜狷介非文行有志節者謝弗見以是入其室研席蕭然風味不啻書生也

二十八年癸未四十歲二月充會試同考官蓋自己卯庚辰辛巳壬午連年五次點充同考論者謂自來名翰林所未有

可入李文公卓異記也正考官刑部尚書秦公蕙田副考官

戶部侍郎仁和王公際華吏部侍郎滿洲德公保先生分校

春秋二房得吳霽楊慰蔣鳴鹿甯有誠等十一人是年廣西

湖南雲南貴州文鮮佳者秦公彙諸房遺卷屬先生合校之

緣是同考者頗不悅五月二十一日

上啓 蹕幸熱河先生從八月十六日隨 輦進木蘭較獵

九月二十二日還京師十一月梁公薨于位謚文莊晉 贈

太傅

二十九年甲申四十一歲二月補授刑部山東司主事兼辦

秋審處隨 駕詣

泰陵往還凡十九日撰西陵扈從記一卷四月京察一等七

月初八日又隨往木蘭陳星齋通政兆崙以 上書房隨

蹕途次恆有倡和九月還京師十月充方畧館收掌官十一

月紹興商寶意太守盤授雲南知府寶意老詩人先生集同

人餞於畢秋帆修撰沅疎雨樓以詩送行寶意稱先生詩爲

最先是三藏聖教中頗有俚俗猥瑣者

上命諸城劉公詳加刪定公以屬先生與汪康古舍人孟錫

取經律論按日排閱凡六閱月而畢擬刪唐智昇開元釋教

錄畧出五卷因開元釋教錄已入藏元僧祥邁辨偽錄六卷辨道士邱處機李志

常等非毀佛法之偽而稱述楊龜真伽明永樂製序讚文一卷奏進

上從之先生素通禪理及是三乘七部窮源溯流於宗教性相之旨益淹貫融洽矣自已卯至是六年詩編為蒲褐山房集

三十年乙酉四十二歲五月京察一等奉旨加一級六月

充方畧館提調官七月復隨往木蘭是秋彭君光斗為福建

永定知縣鄉試分校得林崑瓊等七人

三十一年丙戌四十三歲二月

上詣

東陵還駐盤山先生從視河淀三月還京師四月西域同文

志告成議敘奉旨加一級是月陞授刑部浙江司員外郎

戶部員外郎西紳素以譎獷稱與兄西慶有郗會其三月幼

孫死孫之乳嫗西慶妾之嫂也欲藉以誣西慶主謀故殺刑

其乳嫗并及其夫酷甚將誣認先生不可大學士諸城劉公

暨署刑部尚書李公侍堯乃使諸司十三人覆驗果無毒狀

於是僅坐乳嫗壓斃罪餘皆得釋七月二十九日陸孺人歿

三十二年丁亥四十四歲春陞授刑部江西司郎中

上幸天津先生從七月復隨往木蘭陸璞堂秀才伯焜來京

師寓蒲褐山房璞堂文定公樹聲七世孫而再從兄木蕃之

女夫也十月兼校經咒館

上稽古右文尤深梵筴開經咒館令章嘉國師偕其徒重

譯首楞嚴經及諸經秘密咒語凡漢唐文字番僧所未通須

講解之故有是職是年納黃孺人自乙酉至是年詩為聞思

精舍集

三十三年戊子四十五歲四月京察一等奉 旨加一級又奉 旨交軍機處以道府記名開續三通館凡纂修條例屬先生與諸君左峩撰定而奏進之七月兩淮鹽使提引事發先生與趙君升之坐言語不密罷職時緬甸未靖 詔以伊犁將軍阿公桂為兵部尚書定邊右副將軍總督雲南貴州阿公文勤公克敦子也素知先生學問幹濟由是請以從 詔許之十月初十日發京師十二月二十四日入滇境二十七日始抵雲南府先生所歷楚黔諸境搜奇覓險詩益富取韓詩外傳饑者歌食勞者歌事之意名曰勞歌集迄於凱還而止蔣舜游檢討鳴鹿序之以為屈子之騷問杜陵之詩史彙而成此

三十四年己丑四十六歲正月初三日由雲南府起程十一

日過下關十八日抵永昌阿公已出萬仞關往止丹山襲擊

緬夷村寨三月初三日往騰越赴阿公招也頃之得 旨命

大學士忠勇傅公恆為經畧四月初八日傅公由龍陵赴騰

越巡閱沿邊形勢而阿公赴大理簡視馬匹先生從十八日

還至永昌二十一日還至騰越七月初猛拱土司遣其頭目

脫猛烏猛來降請早發而右副將軍以二十日啓行二十三

日抵盞達酷暑明日出銅壁關抵野牛壩時連旬大雨八月

初十日抵蠻暮九月十八日水師出江口賊來逆戰擊敗之

十月初一日傅公阿公里至江西岸初十日合擊賊於江

中殲其頭目賓啞得諾獲軍械器物無算十一月十九日緬

酋惜駁以書乞降經畧副將軍乃屬先生偕孫補山侍讀士

毅草檄諭惜駁允其降而

上先以將帥士卒染瘴病歿者甚衆不宜冒昧進兵下詔班師十二月還永昌

三十五年庚寅四十七歲先是傅公還至省城得十旨令同阿公籌安邊善後事宜乃以正月初四日啓行十二日抵省定議入奏而各省兵之在邊者尚未盡撤阿公復還永昌先生同行至趙州取道詣雞足山謁大迦葉尊者道場止於石淙遍游悉檀傳衣五大寺由猢猻梯陟金頂望西域雪山杳渺雲際二月初三日至永昌乘暇游金雞村云是呂凱故居也浴於溫泉又登太保山諸葛忠武侯祠沙河寶山寺及龍泉亭諸勝而

上以撤兵三月緬酋貢表未至令彰總督寶遣守備蘇爾相持檄往責之緬酋留蘇爾相阿公乃復馳赴邊徼九月緬酋

遣夷人具稟阿公請暫止襲擊之舉分兵駐各關隘十一月

如騰越先生暇時過毘盧寺觀壘水河懸瀑又城中有魯家

梅甚古城南有金家松屈曲如蟠螭恆攜酒榼吟嘯其下金

氏子弟出見者爲指示文章流別是年浙江石門知縣黃楷

鄉試分校得莫大邦等七人江西弋陽知縣吳興宗分校得

戴心亨等八人自戊子從軍至是年正月凡山川風土行軍

調發一一紀載成滇行日錄三卷征緬紀聞三卷

三十六年辛卯四十八歲時大兵久撤幕府清閒乃借性

理大全語類或問王文成公集讀之求天人性命修身立行

之要六月阿公罷用理藩院尚書溫公福代之八月溫公至

永昌復奏留佐軍事會四川小金川土司澤旺之子僧格桑

指沃日咒詛發兵盡佔其地竝侵據明正土司濃等塞而金

川應襲土司索諾木亦併革什咱殺其土司
 上命溫公移師赴四川督辦溫公請以先生行九月二十五
 日與趙君升之暨中書舍人王君丹宸日杏發永昌行次合
 江諸生段雲程午夜來送先生惘然占一絕贈之四川鄉試
 孫君嘉樂為副考官得葛良杰等六十人途次來謁者甚眾
 十月初九日奉旨賞給主事隨往四川軍營辦事二十日
 抵成都二十四日選授吏部考功司主事十一月
 萬壽恩詔加一級赴西路進討自過灌縣路皆在山腰峭折
 如綫下俯絕澗又連日冰雪凝凍騎馬險滑無比十二月初
 二日僧格桑遣人訴沃日詛害狀溫公屬先生作檄斥其罪
 十五日師克斑斕山抵達圍破斯當安進攻日耳寨除夕烽
 火滿山鎗礮如雷雨聞呼戰聲殷山谷也至此著蜀徽紀聞

四卷是年吳典宗分校得黃壽齡等八人黃楷分校得張敬

止等七人

三十七年壬辰四十九歲正月在日耳二月參贊大臣五公

岱與溫公評訟 詔罷五公 命阿公往北山木雅斯底代

統其眾先生從阿公督兵緣山而下築卡斷日耳賊人來往
 路三月初九日賊遞退據阿喀木雅十一日賊復棄寨去溫
 公從中路攻木關勒阿公循北山攻美美卡卡北有東瑪色
 渠諸喇為別思滿賊人來路與美美互援應亦次第攻之科
 爾沁親王色布騰巴爾珠爾及兵部尚書果毅豐公昇額以

鞫五公事來于軍時南路總督林統兵次達烏賊據險
 久不能克乃以兵三千屬參將薛琮從墨壘溝經郭舟山欲
 出賊後既行大雨雪兵無繼者金川賊人由格六古來援絕

後路糧盡全軍皆沒

上削桂公職趣阿公督南路兵阿公奏以先生從五月十八日自阿喀木雅啓行二十三日抵成都六月初四日抵卡了接到部咨于進勦小金川攻克斯底葉安案內議敘軍功加一級紀錄二次八月接到部咨于攻克東瑪案內議敘軍功加一級紀錄二次十月接到部咨于攻克資哩案內議敘軍功加一級紀錄二次時計達烏久不攻賊必無備乃於十一月初四日子刻潛師渡溪據其碉卡翁古爾壘之賊亦恇駭遂破其柵二十四日復以皮船渡水破僧格宗番人來降皆釋勿殺其得戶口六千餘十二月初五日克美諾僧格桑走占固溫公亦克蒙固寨屈美諾會師僧格桑遁入金川澤旺降械送京師十三日進討金川議分三路溫公偕參贊哈

興由空喀阿公偕參贊明亮由當噶豐公偕參贊舒常往綽

斯甲由日傍俄坡先是阿公奏先生獨子母年七十有餘深明大義勗以殫心軍事今從軍已五年矣請量加拔擢至是得旨以吏部員外郎陞用二十一日哈君病歿于占固哈君本回人勇敢識兵機善馭邊夷軍中皆惜之奉旨以海

蘭察代焉二十四日還至僧格宗二十九日進次郎車爾宗

臘杪聞座主錢公以十一月病卒是年四月許孺人病歿三十八年癸巳五十歲正月初一日從師由美諾進發次當噶山山脊長幾二十里賊排十四碉于上絕險處鎗礮可互相援也二十日攻最西山峯克之三月二十六日三月二十一日攻中兩大碉又克之官兵營壘與賊錯處山脊上兵少弗能徑下自春徂夏雨雪甚賊碉在雲霧中碉下徑仄而隋

兩久泥滑如飴故久之未盡克而將軍溫公自空喀移兵木
果木屢攻不得利賊煽小金川人各反其地先侵登達占固
提督董君天弼赴水死遂分寇登春八卦碣海君與總督奪
隘出溫公兵潰出營數里而歿吳君璜趙君升之王君丹宸
歿於事蓋六月初十日也是月接到部咨于攻克翁古爾壘
案內議敘軍功加一級紀錄二次金川既得美諾乃悉其眾
以犯當噶兵皆力戰賊不能逞參將劉輝祖率六百四十餘
人拒之自亥迄寅殺傷賊二百餘而領隊大臣奎公林於色
木則隘口拒賊日十餘接皆有殺傷賊畏當噶兵堅遂乞降
阿公知當噶不可守姑如其請七月初一日撤至翁古爾壘
阿公奏沃日係進討正路請往視師十五日自翁古爾壘行
先生從抵成都署按察使顧君晴沙光旭先為死事諸大臣

立祠草堂寺側名慰忠且索先生撰碑文先生往奠哭之二
十八日西行接到部咨于攻克僧格宗案內從優議敘軍功
加二級時晨夕得警報而詔旨詢問無虛日先生日行三
四站夜則具章奏治文書以是得疾八月初七日抵日隆關
稍瘳是月接到部咨于攻克美諾案內從優議敘軍功加二
級

上發吉林索倫及京城健銳火器兩營又陝楚兵共一萬六
千南路以明公亮為副將軍故侯副都統富公德為參贊大
臣其綽斯甲路副將軍參贊如故十月二十七日分兵進討
烏什哈達等先進襲美美卡據之額君森特由資哩克阿喀
木雅及沃日海君蘭察克北山之碩藏噶阿克爾布里合兵
上據兜烏十一月初八日兵至大板昭僧格桑復竄入金川

蓋八日而小金川地悉平是月補授吏部稽勳司員外郎議
攻金川以明年正月三路合力進攻是時得家書具知京城
冬暖太夫人聞收復小金川捷為加餐飯

三十九年甲午五十一歲正月朔自美諾啓行初十日抵谷
噶駐營時大雪賊拒喇穆都統海君等督兵進攻克之九月
接到部咨于收復美諾案內加一級紀錄二次時都統兵又
攻遜克爾宗十月潛以兵旁上穆果爾山遂克日爾巴當噶
抵達爾扎克與參贊大臣五公岱兵合十一月克格魯古出
滅金嶺後賊人遁乘勢下至江岸明公亮至宜喜與參贊舒
公出賊不意攻破數碉賊堅守又移兵攻日旁克之距大江
不遠與西路兵烟火相望也刑部侍郎袁公愚谷守制四月
中按事來川 詔令便赴軍營眎狀袁君知軍贖皆先生一

手所辦回奏

上嘉之有 旨垂問阿公覆奏得 旨擢吏部郎中是年七

月戶部郎中孫嘉樂督學雲南八月鄉試侍講白麟典試河

南得劉師柔等七十人中允夢吉典試山西得閔安寅等五

十人浙江蘭溪知縣耿學模鄉試分校得唐燦等七人慶元

知縣熊珍分校得沈景熊等六人前任分巡廣東肇羅道彭

君樂齋端淑蜀中靈光也以詩古文稱教授成都寓書來與

先生定交

四十年乙未五十二歲正月在密喇噶喇木軍營四月明公
等由宜喜下攻盡克達爾圖基木斯丹當噶俄坡甲索而西
路官兵亦於十五日克擦庸羣尼十九日克木思工噶克二
十一日克下巴木通五月十二日又克遜克爾宗六月先生

補吏部文選司郎中七月十二日進攻勒烏圍八月十六日克勒烏圍賊巢九月初七日克莫古魯及達烏達圍各碉閘十月十四日克西里十二月官兵上格隆古山梁科布曲碉寨悉下十七日克則朗噶克下壓雍中喇嘛寺取之索諾木之母阿倉及姑阿青時在河西甲維路斷不能歸二十日來降於是移大營於噶喇依之上即乾隆十三年金川方畧內所稱刮耳崖而北路官兵亦進取河西之地兵至噶喇依對岸南路官兵取馬邦曾達進至噶喇依南移巨礮築長圍合力攻擊是年編勞歌集成

四十一年丙申五十三歲正月在噶喇依軍營接到部咨于攻克勒烏圍案內議敘軍功加二級又于攻克噶喇依案內從優議敘軍功加二級又於金川蕩平案內奉 恩詔加一

級時西南北三路官兵會合四面力攻橫橋長塹水陸俱斷索諾木兄莎羅奔岡達克索諾木明楚克等相繼投出二月合攻益急初四日昧爽索諾木率其兄爽爾瓦沃雜爾弟斯丹巴妻巴底土妹得什安木楚及大頭人丹巴訛維爾竝餘眾二千餘人齋印出降僧格桑先病死并以其首獻是晚用八百里馳奏紅旂告捷兩金川地悉平先生在軍營前後九年和平簡易自科爾沁親王及副將軍參贊大臣等無不親而重之三月初二日自噶喇依班師道路皆設戲棚燈彩以志凱樂十四日抵省吳沖之學使省欽曹荔帷員外焜顧晴沙臬使排日置酒楊笠湖刺史潮觀沈太守清任彭樂齋觀察幫展畢至頗盡譚讌之樂二十日自成都啓程四月初四日抵西安袁侍郎愚谷方從甘肅使回至此王夢樓太守文

治嚴東有侍讀皆在巡撫畢公署置酒觀劇二八遞進逮更餘始別初六日寅刻抵臨潼浴于溫泉二十三日至良鄉之竇店二十六日

上令王大臣等賜凱旋諸將佐飯二十七日駕至黃新莊郊勞先生用戎服行禮賜茶次日至京師見太夫人康強如故喜心翻倒不覺流涕被面也二十九日

上遣皇子獻俘

太廟五月初一日

上御午門受俘訊於瀛臺刑部以逆曾兄弟久抗顏行罪不赦磔死懸首藁街是日

上幸紫光閣賜宴作四裔之樂宴畢復被白金緞匹朝珠荷包之賜初五日得旨吏部郎中王昶久在軍營著有勞

績著陞授鴻臚寺卿賞戴花翎在軍機處行走是時由科甲出身賜花翎者惟大學士金壇子公及先生而已謝恩召見詢軍營前後八年事甚詳是月

上命纂金川方略充總修官月杪濕瘡發臥牀第者三旬餘七月擢通政使司副使時

上已幸熱河乃馳往謝恩召對問蘇松風俗及王鴻緒

張照各家事並九峯三泖形勝若何詳對久之命隨獵木蘭復蒙召見再詢溫福軍營潰亂南路何以獲全軍而出對以副將劉輝祖劉倅及奎林等力戰之功且奎林能與士卒同甘苦致士心堅定故然

上笑曰奎林原有成勞但性情怪異耳獵畢命入大樹園筵宴觀烟火回至京師先生自庚辰秋寓教子衡衡凡十有

七年至是移寓爛麩衙衙京洛名流如陸健男學士錫熊金

輔之殿撰榜周書昌編修永年戴東原庶常震任幼植吏部

大椿洪素人刑部朴及其弟舍人榜張商言舍人瑁吳泉之

助教省蘭吳竹橋上舍蔚光吳胥石季廉蘭庭及門人張漢

宣形黃仲則景仁胡元謹量執經譚藝文酒之盛如初

四十二年丁酉五十四歲自丙申小除日瘡疾復發呻吟牀

蓐者二旬餘正月二十三日

季聖憲皇后仙馭上賓力疾而起入直哭臨

上命同尙書梁公國治副都統博清額給事中劉謙之恭繕

一切典禮蓋以會典中有

列后大喪儀排日紀事仿而志之四月十四日葬

秦東陵先生從二十五日恭奉

神御還京五月初一日升祔

太廟禮成奉 旨隨往諸臣加一級先生已於三月擢大理

寺卿又以升祔 覃恩得封三代曾祖祖考皆 贈資政大

夫如其官妣皆 封二品夫人十一月初十日奉 旨磨勘

各省鄉試中式卷是秋審君有誠為江西奉新縣知縣鄉試

分校得陳曰芳等八人楊君慰為福建詔安縣知縣分校得

邱立人等七人凌君夢曾為四川南部縣知縣分校得李傑

牲等八人先生素甘恬退仕宦非其所尙自蜀歸卽有乞身

之意故是年以後總以杏花春雨書齋名其集蓋取諸虞道

園詞云是年四月納謝孺人

四十二年戊戌五十五歲正月十八日

上恭謁

陵寢先生從二十一日先謁

泰陵次謁

泰東陵二十三日祭

泰東陵從臣皆於門外行禮二十六日回京先是大清一統志成於雍正四年至乾隆二十三年平定準噶爾及回部拓地二萬餘里且府州縣添置改析者多

上命重修迄十餘年尙有雲南貴州四川江西江蘇安徽浙

江諸省及外藩諸部落未成亦 命先生爲總修修之是年

邵一雲庶常 晉涵 孔衆仲庶常 廣森 洪谷主事 繼涵 汪劍鐔

季廉 端光 張芑堂貢生 燕昌 王竹所上舍 初桐 而門人金雲

莊主事 德興 徐尙之上舍 書受 汪書年上舍 大經 楊蓉裳上

舍 芳燦 及其弟荔裳 揆 常以譚藝過從侍講白君 麟 會試分

校得蔡廷衡吳璈等十一人

四十四年己亥五十六歲正月初六日女粹卿歸于 榮 是時

先大夫官中書與先生同在內閣意氣投合交親之誼彌篤

十六日

上以

季聖憲皇后大祥謁

泰東陵先生從二十六日回京師先生因光祿公陸太夫人

未葬屢欲乞歸不果至是以二十八日具奏陳情蒙 恩允

許遂於二月十一日奉錢太夫人由水道南旋而自取陸路

先歸部署三月二十四日抵家上冢以三次所頌 誥詞焚

黃告祭存問親故引親族窮乏者任卹之四月二十六日太

夫人亦至五月初一日依遷葬禮服總且乞盧紹弼學士撰

墓志梁元穎侍講書之錢曉徵少詹撰神道碑翁振三學士以分書書之七月初十日窆儀節規制具自撰歸葬小志中屆期遠近會葬者數百人布衣白首之交及遠方儒生居其半焉八月十八日赴京過吳門見彭尺木進士紹升與譚安養法門甚合布衣江鱸濤聲精古文尙書說文來講學至無錫顧晴涉觀察周抑亭太守際清楊永叔上舍和叔邀遊寄暢園觀王孟端竹鑪觀察命工製一鑪以贈九月初一日至常州集趙緘齋郎中繩男味辛書屋而項秀才森者病於家遣子以所辨太初三統術來就正過瓜洲見高旻寺僧照圓貞照圓爲磬山法嗣扣擊如夙契也至揚州汪劍鐔江秋史德量來見江都汪容夫貢生中以所辨尙書金縢諸篇相質十六日至王家營先是戊戌秋河決儀封十六堡久未

塞

上命英勇阿公莅工公聞葬遣使來賻因往謝之遂登陸過邳州門人睢南同知孫步雲來見談論至夜分乃去二十六日至儀封見阿公及總河袁公愚谷河南巡撫陳公輝祖遂閱南北壩及引河情狀十月初二日由延津北上十七日抵京十八日趨赴 宮門請 安 召見詢江南預備南巡事宜高郵寶應水勢一一陳奏且言河南河工大概翌日遂命明春隨 蹕時先生僦居東華門外西堂子衡衡新知若貢生洪稚存亮吉趙億生懷玉弟子若楊荔裳徐尙之張漢宣黃仲則等數過從談讌如曩時十二月十九日補授都察院左副都御史二十一日又有 旨授河南布政使戶部尙書梁公國治言在軍機房久多聞舊事請畱遂以太僕寺卿

江君蘭代之言五軍...蘭

四十五年庚子五十七歲元旦

上御太和殿受朝先生以副都御史上殿侍班午刻筵宴

京師去冬少雪是日子刻同雲四合從卯至午積雪四寸有

餘官民歡呼稱瑞十二日隨侍南巡啓

泉賜直隸大吏食且觀劇先生與焉并命和御製詩

至夕召觀燈火入宴元夕次趙北口行宮復命觀燈

聯句同作者額駙忠勇公兵部尚書福公隆安吏部尚書協

辦大學士稽公璜戶部尚書梁公國治直隸總督袁公守侗

戶部侍郎和公坤董公誥禮部侍郎達公椿內閣學士兼禮

部侍郎嵩公貴翰林院侍講學士國公柱左春坊左庶子劉

公躍雲陳編修崇本凡十二人得庚字七言排律五十韻是

夕層冰皓月積素皎然箏版參差魚龍曼衍獲與賡歌之盛

真異數也時以

萬壽恩詔加一級十九日次絳河山東巡撫暨布政按察兩

使來迎賜食和詩如前三十日次泉林賜食復頒示

御製七言律令和之二月初九日次桂家莊同江南總督巡

撫鹽政織造暨兩使賜食又赦和御製詩初十日

聖駕渡河禱於神卽事賦詩次直隸廠敕令恭和是日儀

封十六堡決口合龍僉謂

至聖積誠所感也十四日至揚州奉命祭宋宗忠簡公澤

明史忠正公可法本朝張文貞公玉書于京口二十三日

至蘇州奉命祭吳泰伯范文正公仲淹湯文正公斌陳恪

勤公鵬年張清恪公伯行祠復命又同浙閩總督巡撫兩

...

使諸臣入宴和詩三月初二日次杭州命祭陸宣公錢武肅王岳忠武王子忠肅公祠又賜公御製全韻詩擬白居易新樂府又敕和御製杭州卽事瑪瑙寺葛嶺諸詩十五日回鑾次嘉興奉命授江西按察使十六日山東壽光縣民魏萬年控縣令勞敦樟派累有旨令同刑部侍郎阿公揚阿會鞫謝恩請訓行清江浦漕運總督鄂公寶來縣民勇阿公雨江總督薩公載布政使吳公壇皆以相度雲梯關海口形勢駐此先生往見之渡河取王家營陸路由宿遷鄭城沂水蘭山臨朐以二十九日抵青州四月間侍郞自京師至同讞事十九日讞事畢發摺行聞璞堂成進士尋改庶吉士抵濟南見蒿庵書院院長王惺庵進士元啓嘉興人工推步所校史記天官書漢書律歷志尤爲精核行抵博平

珠官屯復命召見命赴江西且垂詢母尙健否

予五日假回籍迎養五月抵里遂奉太夫人啓行六月十一日抵南昌接印任事十三日具摺謝恩并陳到任日期與經過地方晴雨狀十八日太夫人從水路至江西環山帶水多竊盜如臨川一縣報竊而未獲者自四十一年起至四百餘案先生以爲盜者亂之漸竊者盜之漸人少則竊稍多則盜再多則亂其勢相因而皆起於貧民之游手無藉者于是檄府州縣力行保甲先書無業者民好賭生事者遇有竊發先詰之次責保甲毋得容畱外縣人有則詰所從來及其所業與本籍姓名書于冊無業者逐回本縣可疑者執而訊之以杜姦宄之原江西人聚族以居有所爭各選族之狡悍不畏死者什百爲羣互相格殺謂之羣毆亦謂械鬪先生曉以

若輩之爭大率山頭地角所植穀物所產竹木爲數無多而彼此殺傷甚有至四五命者實爲大惑大愚遇事宜各三思毋輕性命毋蹈前轍又有建家祠于府城省會中者遇訟則出祠堂公產之資招請訟師反覆告訐不休先生曉以祠堂本爲敬宗收族而作所以教孝弟敦嫺睦今盤踞爲構訟地變詐機巧無所不至豈前人立祠本意嗣後有似此者當依前巡撫輔德所奏毀其家祠州縣審命盜之案逾限者累累先生謂承審各案豈皆難辦必須往返咨查從容訪詢者大抵州縣中或好聲色或飲酒逸樂流連光景因以致此各宜振厲奮發刮洗舊習依限完結違者必揭參示儆因飭胥吏每囚至三日內必讞讞畢卽發回率先以振起之時靖安縣張起鳳毆死其八歲甥傷痕微渺縣以爲顛墜死府以爲毆

死犯者游移其詞先生集府州縣之在省者三十餘人親往檢驗與衆共著之供詞乃定凡讞事坐堂皇不坐燕室計六十餘日中讞決者百有餘案而錢太夫人自三月來飲食漸減由錢塘換船赴任冒暑雨病鬲益劇旣而氣逆上以八月二十四日酉時卒先生哀毀盡禮蓋太夫人以是年十二月十六日年八十宗人鳳階光祿錢曉微少詹皆已先期作文介壽而不及稍待以是增慟焉九月二十二日扶柩由彭蠡出大江順流而下以十月十七日回籍是年紀隨 蹕至赴任爲屬車雜志二卷豫章行程記一卷

四十六年辛丑五十八歲居憂先是所居蘭泉書屋年久頽圯因稍葺之光祿公常以思岡公來未立宗祠爲憾又慕范文正公義莊勗子孫有力當勉爲之先生併欲置家塾以教

族人子弟已亥秋卜地於所居橋南起祠屋三進共二十間
置田五百畝以供其用又藏經史子集四萬餘卷金石文字
法帖二千餘通詳見自撰祠塾規條及塾南書目八月初十
日奉錢太夫人柩合葬于雪葭灣是時先生尙無嗣因議以
從弟職長子肇和爲子是年六月四川進士楊君卓莅青浦
任請先生修縣志

四十七年壬寅五十九歲住萬壽道院志局遠方賓客門弟
子雜遝過從四月浙閩總督陳公輝祖書來以西湖志雍正

初年所輯迄今幾五十年 翠華五屆 宸章奎藻俱未恭

載而名士藝文及祠廟寺觀重葺者皆當蒐討續載請先生
爲總修謝不赴十月禫陳公再以書來促乃往寓西河陳氏
就莊先生發凡起例粗具稿復以病歸家月餘稍愈時陳公

以事落職河南巡撫富公勸渾晉總督甘肅布政使福公崧

晉巡撫先後抵任皆先生舊好也乃復往西湖志局歲暮歸
葬鄒夫人及許陸兩孺人於雪葭灣新阡而自爲生壙焉

四十八年癸卯六十歲正月十四日復由蘇州至西湖志局
值上元後尙寒湖上游人晚閒稀少先生數理小舟乘月游

歷諸勝同局諸子呼伶人數輩箏笛隨之遙望湖心亭及沿
湖樓閣燈火微茫聞出林際而遠鐘星星與箏版相聞覺此

游如在方壺瀛島聞族子嶰谷宜爲之圖諸子多作詩以紀
之開化門人戴金溪秀才敦元亦來湖上而竇公東臯爲學

使金韻言助教學詩沈芝生秀才清瑞在幕中時出爲酒
之會二月十六日福巡撫傳旨補授直隸按察使時志已

修十之七八乃以稿封交撫署而歸二十二日抵家凡計六

日辭家廟行回首故園殊戀戀也二十八日抵蘇州見閔巡撫鶚元發摺謝恩初一日自蘇州行抵泰安孫補山方伯

遣人來候始知改調西安按察使蓋秦公承恩已陞任湖南

布政使故也二十三日抵圓明園二十五二十七兩日皆

召見命速赴新任遂陛辭四月初四日出都取道山

西二十三日抵西安著適秦日錄一卷見巡撫畢公慰勞殊

歡幸也是秋鄉試吳君興宗為商州鎮安知縣分校得王榜

榮等八人黃君楷為儀徵知縣分校得薛體洪等九人十月

具奏命盜凶犯脫逃通緝宜行於定案之時不應行於半軍

之後使姦宄得以從容竄匿又陝西所屬南如興安漢中北

如榆林延安綏德皆距省一二千里秋讞時囚徒解省悉致

脫逃請令各道就近覆錄皆得俞旨允行時吳企晉舍人

為關中書院院長嚴東有侍讀錢獻之州判北莊似撰明府

所徐友竹上舍堅洪雅存季廉孫淵如上舍星衍及王敦初

上舍復皆在長安公務稍閒輒以詩詞倡和為樂惟聞黃仲

則歿於山西運使署中為之繫欵竟日先是先生集朋好工

詞者為琴畫樓詞鈔企晉請梓之兩月而成計二十五家共

二十五卷是年娶媳錢氏

二十正卷景平斐敬錄

歸善為理畫對歸德金晉清林之兩民而短信二十正卷共
限致於山西戰頃署中德之榮赫竟日次景次主榮限致工
土舍前昔在具安公將派民神以精歸國將派樂歸國黃
秋翁文計土舍聖共蘇谷李源蘇國賦土舍皇又王輝
為關中書判劉具羅東有詩龍送德之州賦此其以對明

述庵先生年譜下

吳縣 嚴 榮 瑞唐編

四十九年甲辰六十一歲上年十月二十五日榮婦王恭人

粹卿歿至是得家報先生哭之慟四月間甘肅固原屬鹽茶
廳回人田五阿渾倡復新教糾眾攻破西安州土堡海城小
山回賊附之回人最尊者曰罕其次阿渾蓋通經典主教之
稱也總督李公侍堯提督剛君塔由八百里具奏十九日奉

旨以西安州距陝西長武六站恐回人竄入陝境 命往
禦之二十日秋讞畢遂行二十二日至長武長武有都司一
員兵一百三十名為提督調去存三十名又益以宜君兵五
十名合參將孫受兵四十二名共一百二十名而長武之通
甘肅者有七路各以兵役數人守之李公已赴鹽茶游擊高

人傑督兵截殺田五自戕死二十三日提督與賊餘黨張文慶等戰於浪山賊走會寧時孫受所領兵與宜君兵復被提督調往長武勢益單又聞賊由打喇池狼山口走安定之官川其地為前回人馬明心所居新教回人最多處也賊由此而東南勢張甚先生以為甘陝相通路徑長武最要鳳翔隴州次之總兵三君德從興安率兵至鳳翔巡撫屬其在隴州駐守而長武至隴州當由邠乾東折而南計七站若由長武而南逕靈臺縣之獨店麟游之天堂鎮寶峪山逕鳳翔至隴州計程三百里一日可達乃令各縣量設驛馬於是隴州之信朝夕相通矣長武兵除分守隘路外四城門及監獄倉庫皆需撥兵防守又運送軍須兵無可用乃借兵於三君得兵二百令通判黃秉哲率領以來殺牛享之分撥城內外聲勢

稍壯民心乃安五月初五日賊從官川徑瓦岔擾車黃寨初六日搶西鞏驛馬初七日搶義岡川初八日擾魏岔又自馬家堡翻山走安定典史費元登遇賊死於是石峯堡賊附之破通渭典史溫模自縊死在籍知縣李南暉率子弟巷戰皆遇害初九日掠蔡家堡十一日明副都統善孫參將以滿漢兵一千七百人住高廟山擊賊賊佯退伺官兵稍懈四面緣山而上明係戰死亡者數百人賊烽距長武不及三百里事亟先生乃試炮巡城為防禦計數堞以分人因人以料物籍城外民強壯者識其名如有急入城協守凡刀矛銅鐵炮石燈燭油米之類悉具民恃以無恐邠乾永壽皆鑿塹填門而長武民出入往來自若也聞石峯賊欲由秦安之蓮花城進擾隴州提督與將軍傅公玉分駐鹿鹿黑風兩山十七日賊

一走秦州掠官子鎮一走伏羌縣十九日圍縣城知縣楊君蓉裳悉力固守先是李公追賊輒尾賊行至是屢得嚴旨乃以二十二日會三君兵擊賊於北山梁三君力戰破之伏羌圍解二十四日賊上鎖子峽走蓮花城分竄靜寧水落城及底店石峯堡而

上已命大學士阿公戶部尚書福公康安領侍衛內大臣都

統海侯蘭察領京兵從山西來工部尚書信勇復公興領兵

從河南來福公以六月初五日過長武馳抵隆德以李公械

送京將軍莽古賚統寧夏兵一千阿拉善王旺親班巴爾統

蒙古兵一千五百皆會隆德十一日先剿底店之賊自辰至

酉殺賊三百餘人賊首馬文燾率眾降十五日四川將軍義

烈公保寧統屯練亦至大軍進逼石峯堡考石峯堡即唐書

吐蕃之石城明成化四年滿俊據此作亂項襄毅忠列兵圍

之其將出沒被擒俊乃降先生詢西安人曹光芳等亦云此

堡離通渭城五十里登鹿鹿山望之一切了了可見其地四

面峭壁一綫螺旋上多土窟石洞賊匿其間云十七日阿公

過長武二十一日臨石峯堡督諸軍攻剿又相山址要處築

卡斷其水道七月初四日堡內投出婦女一千五百餘名至

夜賊欲突圍走海侯覺之率兵邀截射殪者無算初五日破

其堡阿渾張文慶李可魁馬四娃等皆就擒餘黨逃逸者悉

搜捕誅之時聞敷君倫泰將踵三君赴甘肅調太原總兵富

君敏泰代之先生恐其未習地利遂由靈臺赴鳳翔過汧陽

乘便鞫事從隴州出長寧驛與敷君相見且閱各要隘形勢

復歸長武李公械至刑部論斬下獄提督革職發伊犁阿渾

等皆磔於市是役也自陝省綠營駐防五千名之外調晉省
兵二千名京兵二千名絡繹過長武需車輛馬騾約以萬計
又銀錢火藥鎗炮軍裝駝載者又以千計危如碁累紛如蠅
集而先生不攜胥吏不藉賓僚飛書草檄咄嗟立辦暨乎班
師竣事無一舛錯遺誤者奏上輒奉旨嘉許並議敘加二
級程魚門編修自都來訪六月抵西安先生未及見以詩迎
之未幾卒於巡撫署方事之殷也尚與蓉裳遙相倡和所過
邠岐汧隴以詩紀其風土又以長武學廢兩廡圯粟主久失
乃出俸錢率署邠州知州張曾育長武縣知縣樊士鋒修之
子衿奮踴輸助閱兩月而成斲石以記其顛末河原其
五十年乙巳六十二歲在西安時畢公被曹旨陞見以正
月初十日起程布政使圖公薩布署巡撫事先生署布政使

事二月十七日得旨畢公調河南巡撫何公裕成調撫陝

西三月何公至西安先生仍回本任先是城南興善寺隋時

古刹也前有轉輪殿庑藏經歷久傾圯先生集眾願修之并

勒文以紀其略又畢公修西郊大崇仁寺並起五百羅漢堂

屬文爲記令嘉定汪貢生照以隸書書之而勒諸石十月得

旨何公調撫江西以貴州巡撫永公保代之圖君奉旨

陞見先生仍署布政使迄十二月謝事嘉興張孝廉誠來

謁孝廉喜爲五岳游蓋徐霞客之流亞云十二月十九日祀

蘇文忠公于廉讓堂陪祀者十餘人作詩記之以公會仕鳳

翔通判也是年八月黃孺人病歿

五十一年丙午六十三歲先是壬寅歲先生修青浦縣志橐

存篋中攜之西安至是二月志成屬吳江史君誦芬善長賁

送巡撫閔公使縣令刻之又因各省刑名皆有省例蓋舉部
駁之案及條例之異常者纂輯成帙以備稽考西安獨無遂
飭吏胥盡發數十年舊案編成五十卷刻藏于署四月圖公
授湖北巡撫湖南布政使秦君承恩調補陝西先生復署事
六月秦君至西安七月河南伊陽縣民秦國棟等三十餘人
戕知縣孫岳瀨而逸畢公搜捕不獲因奏言伊陽壤接湖陝
恐由熊耳諸山逃入商洛鄖西諸處得旨派往督緝於是
先赴商州以商州龍駒寨下接河南浙川爲商民販買水陸
要路檄州同李景蓮派兵役邏之八月初二日奉旨授雲
南布政使仍令督捕事竣入都陛見乃遍歷雒南山陽由
曼川關下漢江過湖北鄖西抵白河洵陽還至鎮安責令各
府州縣及參將游擊都司等分路搜捕設兵役於關隘以稽

出入詰保甲於村落以杜隱匿時直隸大名府民段文經徐
克展等亦聚衆爲八卦教戕其巡道熊恩紱

上並命督率搜捕乃還至潼關沿河而北歷朝邑郃陽韓城
審視各渡口亦分派丞弁督兵役稽之九月景蓮及商州游

擊張濯山陽縣知縣孫烈先後獲秦國棟及其子弟餘黨解
京師屢得優旨命卽入陛見因撰商洛行程記一卷

十月啟行過華陰游玉泉院雲臺觀欲登蓮華峯至青柯坪
微雪罡風大作不果行至蒲州景君安方爲山西河東道出

深省堂詩集屬爲序蓋兵部郎中富君森布子富君與先生
善故執禮甚恭十一月十七日詣闕召見詢問歷來軍

機密事及前于文襄公當國狀又奏因肝氣不和精神疲憊
請改京職

上垂問所服何藥一一奏對 溫旨不許乃 陛辭是時翁
 振三宮詹曹來殷學士陸健男大理皆奉 使督學都門無
 復有詩酒之會矣二十五日出京經汴梁謁畢公置酒觀劇
 遇洪君稚存徐君友竹款語移時而別除夕抵荆門州建陽
 驛連日大雪西北風呼湧途中寒甚

五十二年丁未六十四歲正月朔抵荊州初七日過常德提

督俞君 金鼇 舊識也門人沈 世燾 以雲南池南道俸滿入都

至此遂同飲於俞君署乃別三十日過貴陽巡撫李公 慶霖

率司道迎餞於雪厓洞明日行二月初七日入平彝境十三

日至省城總督富公 綱 巡撫譚公 尚忠 同司道來迎遂抵任

著重游滇詔紀程一卷滇省銅政最繁為廠大小四十有八

每歲須京銅六百二十三萬斤有奇九省採買銅一百四十

五萬斤有奇寶雲東川二局鑄錢銅七十六萬斤有奇而其
 餉補運者又須數十萬斤以是案牘最繁皆當鈎摘稽考先
 生昧爽而興至篝燈批飭猶未竟也又以滇省產銅雍正年
 間鑄錢以運京運至湖北之漢口鎮再運京師後乃由各廠
 分兩路水陸以達四川瀘州復由瀘州下江入運河以抵通
 州規條數改參差錯互其各省採買漸次加增之故案牘亦
 缺失自運用滇銅來其停減採買洋銅價值及鑄錢餘息其
 計增帑至千餘萬兩且開採既久祠老山空鑛質多麤雜以
 砂石陶冶有須十數番者加以入山深則米販遠煅煉久則
 取柴難自滇及蜀步步皆蠶叢鳥道夏暑雨冬積雪及瘴癘
 起皆不可行農忙少牛馬亦不可行運價日貴司事頗憂不
 繼而莫能推其顛末先生盡發故籍作銅政全書五十卷然

後補揀之方暨調劑之術可考而知矣時寧海令揚州蕭霖

工詩太和令江西杜鈞工篆書嗜碑版因得段氏平定南詔

碑文又得安寧唐王仁求墓碑遂屬知州董傑封其墓為文

記之又屬保山令王彝象修楊文憲公慎祠於永昌特犒僻

處西陲士人奔陋四方知名之士罕有來游者惟鍾祥余君

元亭慶長頗知亭林之學尤遠于尚書主五華書院及其弟

璟度慶遠俱為文字交而昆明諸生陸藝陸藻弟兄能詩畫

安徽潁上縣知縣陳綱齋文燦楚雄縣人故門生也能詩常

以所作請正焉布政使署中舊貯御纂七經乃陳文勤公

宏謀為使時所刻又有朱子全書近思錄藏版既久多缺爛

先生補刊印行之分置各府州縣使諸生時習之滇省號佛

地而釋教衰微罔知戒律屬歸化寺戒僧本立以十月開戒

遠近至者三百四十五人刻為大悲壇同戒錄是年門人孫

君淵如以第二人及第而曹學士來殷卒于廣東學政任嚴

東有侍讀卒于廬江書院先生為詩弔之

五十三年戊申六十五歲先是省城五華書院為鄂文端公

爾泰所勅公歿祀其中至是久廢先生乃新栗主祠以楊文

定公名時尹文端公繼善陳文勤公宏謀李恭毅公湖明公

瑞五公皆雲南總督巡撫清名厚德譽望最隆明公清廉英

銳殉節緬中而國子監司業王公太岳前任布政使於銅政

有功並祀之以從士民之望二月次丁率府縣及書院諸生

致祭作七賢祠碑文使安寧州學生劉馨分書以置于壁時

騰越州城工修竣年餘乃奏往勘驗以三月初二日行沿途

望雨禁屠宰先生亦齋戒廉從皆不得食魚肉每過州縣農

起步禱龍神城隍諸祠至廣通得微雨自是霖霖不絕初八日得旨授江西布政使與李君承鄴對調以年老多病且

距江蘇本籍較遠恐水土不宜故有是命

聖恩體恤之至意也及抵下關聞緬甸因耿馬土司來請入

貢遂往大理偕提督烏君大經池西道楊君以溪詢狀使具

言緬酋孟隕輸誠屬實乃奏記于總督請入奏明日赴騰越

閱城畢總兵劉君之仁置酒于大樹園園屋無多前後有竹

數萬挺大樹數百株濃陰清樾爲州縣公讌之地明日還至

下關雨益甚以四月十四日回省六月初一日李君至十二

日啟行父老香花杯酒走送者自城圍至鷓鴣哨興福寺二

十餘里不絕十九日出雲南境至貴州七月初九日出貴州

境十七日抵常德提督俞君云初十日江水潰荊州萬城堤

澄州以下浩漫不可行宜由龍陽出長沙過岳州取道武昌

乃如其言二十一日至長沙鴻臚寺少卿羅君徽五典方主

嶽麓書院來見請往游焉少卿出所註詩易頗有新意二十

七日過岳州府上岳陽樓樓久不修岸將圯張文敏公所書

范文正公樓記在屏上重刻亦失真振衣盼望舉杯獨酌蒼

茫數萬頃君山編山如在几案北望湖水清黃各半蓋江水

侵溢之故已而岳常澧道臧君榮青及府縣皆至招飲示近

日所產白鳥朱眸雪羽瑞徵也八月初四日抵武昌總督巡

撫及兩司以勘災故俱不在學使吳泉之來迎城中水深三

四尺許而漢口亦被淹寓江漢書院院長門人楊西和倫也

史誦芬亦至明日同登黃鶴樓樓傑麗深靚塑仙人乘鶴吹

笛像翛然出塵勝岳陽遠甚住兩日雇騾行九月十一日至

熱河 召見詢荊州水決情形奏言據連次所問今年各省
暑雨過多江旣盛漲而漢口及洞庭彭蠡兩湖水皆入江以
截江流下壅而上潰故至此

上頷之旣而奏請京職如前時

上以十二日回鑾 遂命隨行十六日至遙亭復 召見

上諭以人材難得速赴新任十九日回京二十一日出彰義

門十月初五日渡運河抵徐州見族子叔華教授 元勳以李

愿石幢搨本相示十二日渡江見總督書公 麟是夕寓秦淮

嘉興王若農 尚珏及江寧教授錢漑亭 塘來若農蓋惺庵子

也遂畱飲二十三日入江西境二十四日過東林寺頽廢殆

盡唯三笑堂存白蓮池亦淤爲田殘僧三四問以遠公及蓮

社高賢不知爲誰某問以淨土不知是何法門也二十八日

至省城任事著雪鴻再錄二卷會是秋江湖水溢近江十五

縣頽被淹前署布政使額君 勒春先已查核被災分數及貧

戶等差入報奉 旨賑恤先生由水路覆勘之所過堤堰衝

塌及田畝爲沙所壓積者皆親自履驗由南昌新建歷餘干

萬年都昌建昌德安等縣召災民詢以所得銀米若干務與

冊符又見老弱孤寡輒撫慰之十二月十四日過星子登開

先寺上黃巖殘冬寒沍無瀑布還宿棲賢十五日入白鹿洞

書院祭文公祠招生徒而勸勉以正學晚至歸宗寺觀右軍

墨池摸廊間董文敏各石刻十七日回署

五十四年己酉六十六歲在南昌有友教書院屋滲漏不可

居先生新之又修宋蘇雲卿祠于東湖上二月二十四日得

旨授刑部右侍郎先是高安朱文端公 軾萃二十一史中

名臣儒林循吏為三錄刊成未及頒行先生因其可以勵世
出俸金屬高安知縣小門生張古餘敦仁印數百部及是

命下乃舉以贈總督書公屬其分給州縣冀稍有裨於吏治
先生頻歲馳驅南北旅費既多署布政使額君助之始得辦

裝乃以初五日啟程二十八日抵京師詣 宮門謝恩 召
見奏對稱 旨時京城買宅甚貴糧道陳嵩山蘭森為大學

士桂林陳文勤公孫云有故第在內城勾闌衒衒可居遂寓
焉閏五月初五日

上幸熱河先生從八月
上丁祭 聖廟 命祀啟聖殿又屢 命和詩 賜紗緞果

蔬甚夥又 賜詩經樂譜 御題春鳩墨刻 御題五福五
代同堂記二十一日旋京同大學士九卿詹事科道秋讞十

命同磨勘各省鄉試中式卷十一月初五日直隸新安
縣民劉巨川控總甲等於被災賑濟及借常平倉穀均有勒

索 命借倉場侍郎蘇公凌阿往按之二十三日勘畢還按
察使富宜善來新安以其父傅勤公顯行狀求為神道碑時

同里沈惟吉明經廷枚張書堂秀才拱先後入都來下榻
五十五年庚戌六十七歲是年

聖壽八旬正月元日筵宴於 保和殿 恩詔頒布天下將
謁 闕里告成於岱宗二月初八日啟 蹕先生從先謁

東陵次謁
西陵禮成遂由秋瀾行至德州同直隸山東諸大吏 賜宴

觀雜劇角觝如常儀二月望日
上臨曲阜 親詣 聖廟行禮 命分獻孟子又 命祭少

手譜下

吳陵顏子墓仲子任子祠過濟寧見黃小松司馬易暨布衣

李鐵橋東琪兩人皆深於金石盡發其所藏碑版摩挲之途

中 賜和 御製詩三十餘首同扈 蹕者為翁振三閣學

禮部侍郎鐵冶亭保酬唱殆無虛日還至青縣司馬莊會高

郵州典史陳倚道密揭是州書吏假印重徵詳報布政及巡

撫不辦狀

上遣兵部尚書慶公桂同先生往鞫乃偕刑部員外郎許君

秋巖兆椿行三月十六日至高郵會總督書公同鞫而書公

先已獨訊且奏所揭屬誣

上以不俟欽差明有專擅袒庇禡其翎頂已而慶公等勘得

重徵實情下知州吳煥于獄並劾揚州府知府罷之尋得

旨令逮閱巡撫鸚元行至紅花埠復奉 旨勅訊康布政基

并案逮治慶公偕巡撫北行先生獨往江寧訊畢其袒庇

情形一一如

上所指時姚君姬傳韓來晤方主鍾山書院嚴東有子觀亦

來謁觀字子進殫心地理所補元和郡縣志簡而能該先是

趙君雲松從揚州安定書院來訪古懽重見皆可喜也四月

初六日遵 旨帶同康君取道江浦以行五月二十八日抵

熱河 召見於避暑山莊 詢問江南吏治對以各督撫皆

務為安靜而州縣貪戾不法輒相容隱因以致此

上頷之下其事于刑部分別治罪而總督亦罷職來京七月

二十八日

聖駕自熱河還迎 蹕於密雲適湖南湘鄉縣民童高門控

書吏收漕折色各款

上命同兵部侍郎吉公有堂慶馳驛鞫之遂率兵部員外郎
丁琴泉雲錦及許君秋巖啟行時

萬壽屆期萬方送喜自內外四十八旗喀爾喀蒙古之外西
藏大喇嘛哲卜尊丹巴呼圖克圖噶爾丹錫將呼圖克圖安
南國王朝鮮南掌緬甸陪臣哈薩克使臣金川甘肅諸土司
臺灣生番巴勒布番人咸來祝釐獻畫先生將出都梁元
穎侍講錢曉徵少詹亦以慶典赴京相晤絮語移時八月
十三日宿新鄉晨起望闕行禮月杪抵長沙九月由水路
赴湘鄉初七日奉旨令審湖北應城縣武生李杜控倉書
科派買穀又斂錢買馬折收草費各款遂發摺起行與吉公
渡湘水十五日至武昌十六日得旨以江陵縣民趙學三
控書吏何良弼等包攬方家洲堤工偷減土方復命鞫之

赴荊州乃拜摺具言先往德安再赴江陵閱江堤大江自宜
都西來入荊州境其上兩山東之堤自萬城始乾隆五十三
年夏秋多雨如漢沔洞庭彭蠡皆漲爭入江以截江趨海之
勢於是江水騰溢齧江陵堤決二十二處衝西門入從北門
出漂軍民壞房署無算

上移畢公爲湖廣總督發帑五十萬兩修之又命大學士
阿公督辦公相度形勢江岸南高北下而近南岸有窖金洲
長七八里寬二三里江至此不得展拓故涌而潰遂於北岸
楊林洲黑窰廠觀音寺築三石磯挑水循南岸行以刷窖金
洲且悉犁其蘆荻去其根結今洲勢日削已著成效若數年
後洲汕盡則水不北侵府城可永固矣然聞居民言五十四
年夏間江漲距堤面止二三尺許或謂四川陝西湖北山木

叢密處多墾爲種包穀地遇雨浮沙隨水下於江江雖深日久漸淤是以水勢年增別無上策惟高築堤以資扞衛耳閱三磯竟又三十里至方家淵按故冊丈量無減少其殘損處應賠補者屬知府張方理任之民始悅十五日閱郝穴堤自萬城至此凡兩曲其間如郝家淵堤爲水所刷土時時墮水中亦不可不亟修也觀音寺後有陀羅尼經幢元至正六年都水使者賽音不花造以畏吾兒字書因江形至此如象鼻仗大雄力以爲控制二十八日荊州堤工訖畢發摺渡江又命訊湖南永明縣民蒲太圻控告賄買武童等事又得旨長沙民王澤遠告知縣勒買常平倉穀命往鞫之雨雪連旬小除始微霽除夕同吉公及丁許兩君小集皆有詩是年以恩詔晉封三代皆光祿大夫妣皆晉一品夫人

生暨鄒夫人亦封一品

五十六年辛亥六十八歲正月初一日寅刻率曹郎於寓次望闕行賀元旦禮初三日王澤遠案審畢繕摺奏聞時蓬心來晤年七十餘精力愈健諧謔間出其近畫清蒼簡遠直宗北苑故能獨出冠時爲先生作雲棲教觀圖十六日蒲太圻永明案審畢發摺行入楚來命鞫四案分別奏上勅部核議均如所擬奉旨允行十九日過常德時城外有花貓堤之役蓋沅江合九溪之水下注常德府城正坐灣處逢盛漲水與堤平畢公請帑二萬三千兩築石櫃以禦之櫃卽江陵所謂石磯黃河所謂攔水壩也櫃形三角沅水從西南來有櫃以抵其衝則水迤邐而南刷去停沙東北入於洞庭府城北面可以安堵明日遂往觀之二十四日抵荊州覆

勤方家淵堤工尚未修補乃以知府張方理草率捏飾具奏
落其職二月初二日過南陽臥龍岡謁諸葛忠武侯草廬有
三顧堂故蹟前巨碑二刻前後出師表字頗雄渾其旁楓柏
亦數百年物初八日抵衛輝復讞蒲太圻所控一款上之十
九日至海澱二十日召見奉旨詢問所讞諸案是否無
冤奏各處皆有奸民然有司啟之胥吏釀成之亦不能薄其
罪也

上以爲然又以出使頗久令回休息蓋蒙

聖慈體恤如此著使楚叢譚一卷先是庚戌歲恭遇

聖壽八旬停止勾決至辛亥以一年辦兩年案牘入秋審者

一千七百餘人爰書繁重每日自進署外歸則勾稽比擬輒

至夜分凡百餘日始畢八月十八日至二十四日會大學士

九卿詹事及各科道會勘于天安門外金水橋南朝房乃進

本自八月二十一日始迄九月十二日進畢乃候 勾到在

行在勾六次在 朝勾八次十一月十二日始竣事焉時

鐵冶亭侍郎玉闥風閣學保李鳧塘編修驥元阮伯元詹事

元王懷祖侍御念孫及子伯申引之咸在京師文酒之會不

減曩昔冬至得寒疾歲暮而痊

五十七年壬子六十九歲 上幸山西五臺以三月初八日啟 鑾先生從十二日由良

格莊詣泰寧山謁

泰陵禮畢又謁

泰西陵如前儀十七日至王快路漸高四圍山勢益峻層巒
疊嶂尚有積雪二十日過龍泉關上長城嶺雉堞參差先生

跋馬而上石徑詰曲俯臨絕壑凡十五里上嶺而下是爲山西境矣二十一日 駐白雲寺二十二日 駐菩薩頂五臺
梵經謂文殊師利法王子道場一名曼殊舍利唐清涼國師澄觀著華嚴疏鈔於此元時番僧始來居之故山中喇嘛最多近日章嘉胡圖克圖寂後亦昇其龕塔于鎮海寺喇嘛傳宗喀巴教以衣黃者爲正山中寺院崇麗者率爲所居其餘則謂之青衣僧然孤巖斷磳夙遠幽絕未必非阿羅漢所棲止也二十九日還過長城嶺四月初六日 駐蹕真定知府邱君學勛舊相識也出百十二家古墨見示皆明中葉及國初名人所製者十六日回京師著臺懷隨筆一卷八月順天鄉試上命吏部尚書諸城劉公壩充主考先生偕瑚和菴詹事圖禮副之得聶亮采等二百二十三人

五十八年癸丑七十歲時

上將幸盤山派扈 蹕三月啟 鑾至十三日

上幸天成殊像萬松東西甘澗諸名勝畢十五日各省奏刑名事五件奉 旨均令速議大學士等以爲明日始能奏上先生一日皆具摺奏進

上深嘉之 賜食明日 召見因奏松江近海地卑離家十年餘墳墓間有坍塌乞照例歸省修葺

上允之四月初一日由陸路行二十七日過揚州薄暮抵瓜步出大江先上金山宿望江樓午夜起視江昏月晦隱約漁舟數點而已晨起飯畢放櫂過焦山甫至廊下清風飈飈叢竹戛擊有聲已而住持慧超達瑛出迎以詩見示頗清俊飯罷往三詔洞有焦先坐像烏紗金紫不復作山人裝可一笑

爾還至松寥閣上長江東瀉與海歎歎夕陽照之碎金萬點亦先生前此所未見也宿閣上三更雲霧一無所見惟聞枯槎老鶻時拍拍有聲蓋不至此者三十七年矣明晨回京口見教諭劉君端臨台拱過常州上棧舟亭拜蘇文忠公像下舟適總督書公從蘇州秋審歸過船款語五月初二日抵蘇州巡撫奇公豐額帥屬來請

聖安遂徧拜之是夕雨甚土人云自二月中至此未嘗晴也翌日雨中赴硯山祭曾祖光祿公墓松楸蔥鬱雲煙窈冥徘徊久之回珠街里祭祠詣雪葭灣祭祖考墓以封一品光祿大夫焚黃致告墓生芝一本色微黃其大逾于掌時江浙諸郡名士以詩就正舟航錯互屢滿戶外八月間瘧作兩閱月始已適錢曉徵少詹過訪留宿蒲褐山房明晨招圓津禪院

僧慧照覺銘放舟至佘山并招汪書年及張晦堂興載遠春

興鏞飯於知止山莊又往干山登周氏來雨樓爲門人周仲

育秀才厚培藏賜書處而仲育歿已七年爲之悄然次日

還過慧照清華閣始別先生輯青浦詩傳自機雲以下至於近時女士方外悉爲甄錄共三十六卷先生以體尚委頓欲遲明春北上而

上從熱河還召見大臣垂詢王昶何以未來輦下諸公飛

札具告謂當尅日就道而司寇胡公季堂促之尤力遂以冬

至日行二十二日過無錫正值七十壽辰蓉湖浩蕩垂垂欲

雪買惠泉酒對山獨酌慶者絕蹟自以爲得未曾有自念年

已七十宜懸車然

聖壽八十有三天行之健自強不息且九列中年七十以上

者凡十餘人咸恪恭震動陳力趨事不宜循古禮爲辭惟是耳聾日甚動履盤跚十步九息心思如墮雲霧又不可以戀棧誤公事十二月初二日抵王家營日五更衝寒早起比至京疲憊益甚赴宮門召見遂以精神日減不能供職具奏

上鑒其老病允之謂在侍郎中頗爲出力遂以原品休致且謂歲暮苦寒宜俟明歲春融回籍蓋自大學士漳浦蔡公以年近八旬乞身後迄今十餘年未有蒙體恤如此者九卿動色誇爲異數

上詣瀛臺因進摺謝

恩且言明春俟

巡幸天津送

駕

後啟程南下得

旨報聞是年春

殿試門生陳遠雯

雲以

一甲第二名及第授編修英煦齋

和魏升之

元燧授庶吉士

王晚香

紹蘭

成進士以知縣用戴金溪

敦元補

殿試亦改庶吉士自丙申至是十八年詩編爲杏花春雨書齋集

五十九年甲寅七十一歲元旦入

朝行禮時京城春暝大

學士九卿至翰林科道及部曹諸君皆以先生將遂初自上

元後置酒設餞並以詩文投贈無虛日三月二十二日

巡

幸天津啟

鑾先生先赴黃新莊二十三日清晨送

駕

上領之四月初一日赴通州下船時北省少雨路河淺澀天津以漕艘將來沿河官吏及總兵等咸雇民夫開挖舟行逆水而上又東南風多候開閘候漕船日不及行二三十里六月始至濟寧而各省俱已得雨水漸長漕艘亦過訖遂放溜而南七月二十三日抵家乃以春融顏其堂九月病瘧臥榻

者月餘先生留心理學取薛河津王陽明魏莊渠崔子鐘顧
端文高忠憲黃漳浦馮恭定劉戡山孫蘇門李二曲黃梨洲
諸家著述闡發聖賢要指

六十年乙卯七十二歲三月赴蘇州謁曾祖光祿公墓墓右
丙舍荒圯因其舊而修之前爲硯山丙舍舍三間少宗伯鐵
治亭書額西三間題梵香齋諸城劉家宰石庵書以前曾令
僧居此故也階前地二畝許有小池池中植荷餘地植梅桃
各十餘株雜以玉蘭辛夷及松竹蒲荷之屬南有樓題棲雲
閣爲門人秦易堂司業承業書翁振三閣學撰丙舍記刻置
于壁修築竣艤舟閭門諸名流來謁者如李尚之秀才銳顧
千里秀才廣圻徐澹如秀才葵袁又愷上舍廷樞輩朋簪雜
還樽酒飛騰而與王光祿錢少詹同學同年同歸老得數晨

以尤快事也五月樂成進士 殿試二甲第七名與先生同

蒙 恩點庶吉士先生得報尤爲喜慰九月至錢塘許積

卯宗彥來見入雲樓禮大悲懺七日而歸十一月

上以明年歸政八月先正 東宮又舉行千叟宴 詔中外

臣工逾七十者皆入宴遂以十八日起程挈金青儕秀才學

陸路行十二月二十一日抵京二十二日詣 闕請

安 召見詢問歷官前後及江浙年歲豐稔狀奏對稱 旨

歸寓青厰與吳沖之少司空鄰而那繹堂閣學彥成吳穀人

編修錫麟桂未谷訓導馥辛進士敬業門人戴金溪英煦齋

伊墨卿秉綬徐中書忻沈戡山樂善鄧菽原傳安朝夕往還

殘年旅舍不覺岑寂也是秋太常寺卿施鐵如充山東鄉試

主考官得李方翀等六十九人未還 朝卽授湖北學政王

君紹蘭充福建同考官得鄭瑞麟等八人

嘉慶元年丙辰七十三歲元旦

太上皇帝 御太和殿王公大臣百官稱賀行禮頌之行歸政禮成

太上皇帝還宮

皇帝隨至乾清門乃出更衣服升 御太和殿行登極禮王公大臣百官朝賀奏樂如初是日風日恬和雲彩絢麗咸謂重光復旦之徵初四日行千叟宴禮于 寧壽宮皇極殿王公及一品大臣 賜坐殿中兩列二三四品官及外藩使臣坐殿門廊外五品以下衆耆老坐階下入宴者三千餘人辰刻

太上皇帝陞座

皇帝侍立羣臣依班在殿外行禮禮畢各就位大學士阿桂奉樽跪獻羣臣皆跪又行叩首禮乃坐設酒饌樂作演劇太上皇帝命諸皇孫舉玉卮賜殿上羣臣各叩首而飲酒三行樂畢謝 恩出酒半微雪霑綵服作花六出頃之晴霽雲日皎然上下無不懽呼稱慶頒賞有差先生受 賜玉如意楠木壽杖紬緞裝錦大毳筆墨等十六件是日冊封 皇后午刻復詣 太和殿前 皇上陞座再行賀禮退蓋

太上皇帝聖壽八十有六文謨武烈旁沛宇宙鴻朗昭融純熙悠久超越千古而以

聖禪

聖尤生民以來所未有先生作詩六章用志盛軌進呈得

旨刻入燕集中元夕

兩聖幸 圓明園往侍直二十一日 陸辭那繹堂閣學彭

雲相司空元瑞 沈雲椒少宰初 吳冲之少司空英煦齋編修

偕同人分日祖餞二月初一日餽車啟行及門人又餞於普

濟堂而別行至瓜洲費筠圃巡撫淳 以讞事赴興化相見言

總督蘇公凌阿 已聘主婁東書院三月初五日歸家四月初

一日赴書院知州于君鼇圖 直隸總督成龍 曾孫甲戌同年御

史宗瑛 之子以太倉州志自張受先以來已一百五十年欲

續修之請主其事時汪敬箴編修學金 乞假家居築靜厓小

圃香燈禪版專心淨土先生重聽久至是夏秋酷暑兩日皆

迄秋右目稍瘥已不能潑墨揮翰矣而江浙士人請謁無虛

日校文暇悉以應文字之求歲暮還三泖漁莊浙江巡撫玉

達齋德 阮伯元學政秦小峴觀察瀛 皆嗜好同蘇鹽政楞額

聘為崇文院長因熊布政枚 先期力請仍主婁東且志書未

畢辭不往

二年丁巳七十四歲正月浙中當事皆折簡相招因赴浙由

楓涇至嘉善見同年周穉圭觀察升桓 嘉興晤馮養吾侍御

浩 抵杭州項金門埔 請為東道主玉撫軍蘇麟使置酒邀伯

元學使同汎西湖明日學使邀集瑪瑙寺越二日秦小峴觀

察招游龍井二月朔赴雲棲再禮蓮池大師一宿至理安次

日游韜光靈隱楊梅諸勝門人孫臬使嘉樂 張西曹時風 孫

侍御志祖 暨沈觀察榮勳 龔太守敬身 皆攜酒至寓同邑門

人陳州判花南韶 復約諸名士請游梅莊歸過桐鄉李大令

廷欽 江西舊屬請見門人李大令書田廣芸 為平湖令亦來

請紆道往晤之仍赴太倉八月聞秋帆制府卒於辰州官舍
十二月鳳喈光祿亦歿於蘇州兩君皆籍隸太倉因爲作傳
是時先生老病益甚遂辭講席歸聞大學士誠謀英勇阿公
薨於位

上親臨其喪

賜諡文成而顧晴沙袁子才王蓬心及王敦

初復

亦皆以秋冬繼逝自甲寅至是年詩編爲存養齋集

三年戊午七十五歲二月赴硯山丙舍上冢歸撰顧晴沙墓

銘畢秋帆神道碑是秋編湖海詩傳畢將梓而江寧將軍慶

公

霖爲尹文端公第五子甫抵任以書來約九月買舟至秣

陵遍游寶華棲霞諸山天界雞鳴報恩諸寺會江寧許秋巖

太守秦易堂司業諸君聞曾賓谷運使

煥

以俸滿入都送之

至揚州寓同年沈旣堂運使

業富

家賓谷屢集名流招飲賦

詩聯句五日而歸是秋戶部主事張君

大維

爲貴州主考得

黃燮等六十一人

四年己未七十六歲正月

太上皇帝升遐見費撫軍告以入都遂買舟行二月初一日

過無錫鄒曉屏閣學

炳泰

來始聞京師近事大學士和珅以

言官劾貪墨狂悖不法狀凡二十餘款

上賜令自盡又下

詔開言路肅吏治絕貢獻禁奢侈溫

旨絡繹士庶鼓舞相慶於途二十九日至京寓

榮

邸舍三月

初一日 召見詢問歷官始末及外省吏治民情與川楚寇

盜未平之故一一奏對又 諭云凡有欲言可繕寫密封以

進乃退明日詣

觀德殿前敬謁

梓宮行禮遂條數事進之

上命畱覽時百寮持服公事之餘無私謁惟法時帆祭酒式

善何蘭士御史道生張船山編修開陶偶相過從譚藝而已

清明 大祭上

尊諡并四月十三日百日期滿俱詣行禮十六日具奏回籍

二十日遂從水路南下七月抵家是時吳縣知縣因為富商

追欠于忽國忌日違禁杖責生員四學諸生不服適平學使

來蘇羣往呈訴而按察使同知等收捕諸生平君瑟縮不

能禁止先生移書切讓之十一月阮公伯元由戶部侍郎補

浙江巡撫過吳具書請主杭州敷文書院是年會試鮑覺生

桂星等十二人成進士分別以庶吉士主事用有差英煦齋

詹事充會試同考得蔡鑾揚等十一人

五年庚申七十七歲正月下旬至書院院舊名萬松明王文

成公守仁作文記之碑今不存生童來課者二三百人先生

以辛酉年補博士弟子至是已六十年學使錢公樾松江知

府趙君宜喜請重游泮宮乃以四月中歸里率新進子弟祇

謁 文廟禮畢宴於曲水園九月復至書院是年英煦齋閣

學為順天主考得張葆等二百三十人沈戢山編修為福建

主考得張光浩等八十五人魏升之銓部為四川主考得陳

兆颺等六十人陳遠雯銓部為貴州主考得尹作霖等四十

一人而內閣中書張君桂齡亦充順天同考官夏秋間日疾

甚屢辭院阮公堅畱乃止至歲杪歸里

六年辛酉七十八歲正月阮公差縣丞顧某邀請大雪中過

鴛湖城郭樓臺人烟樹木皆在玉壺天地中為先生前此屢

過所未見扣舷叫絕杭州書院有三自敷文外崇文則馮玉

圃給事培紫陽則御史孫君志祖又戴山則孫淵如觀察諸

暨則禮部郎中孫君嘉樂皆先生門下士浙人以為美談夏

初適課諸生西湖柳枝詞阮公閱之歎其工謂自楊鐵崖後

五百年無更作者選而刊之共得三百餘首先先生與當代名

流往還書札最多而諸城劉文清公及梁侍講元穎墨蹟尤

為繁富陳花南恐久而漸失請合兩家書鑄之名劉梁合璧

江浙士林亦以為墨寶八月英煦齋少司農典江南鄉試得

崔錫華等正副榜一百二十六人時目疾益甚遂辭講席而

歸

七年壬戌七十九歲目疾愈甚以生平所撰金石萃編詩文

兩集及湖海詩傳續詞綜天下書院志諸書卷帙浩繁尙待

編排校勘不能審視因延請朱映澹秀才文藻彭甘亭上舍

兆孫及門人陳烈承秀才興宗錢同人秀才佩陶鳧香秀才

梁各分任之校其舛誤及去取之未當者刻日排纂是春會

試小門生呂兆麟顧純程邦憲等皆授庶常

八年癸亥八十歲元旦望闕行禮畢賦七律一章傳和者

頗眾時詔令雲南清查各屬銅鹽虧空國帑之項計虧

至二百餘萬無可著追雲省督撫請於二十年來各督撫司

道分賠之先生應賠出一萬二千餘兩負無所措乃至蘇州

見署巡撫總督費公及布政使汪公日章請以所有田宅盡

數入官變賣以償凡六千餘兩不足請咨部豁免兩公皆許

之時那繹堂少宰以讞鹽案至浙寄書邀於中途相見因至

吳江會之翌日又送出泔野關連夜挑燈話舊蓋不勝悵惘

也將歸于太守鰲圖館先生于虎阜白公祠即明季顧處士

之塔影園吳中諸名士載酒來訪因作絕句十餘首記之
乃歸陳黃門子龍詩文零落先生前與王教諭希伊輯之得

若干卷又考其墓載於縣志而是時適奉 詔錄明季殉難

諸臣 賜諡忠裕並翰林撰文入祀忠義祠并考其前官曾

授兵部侍郎翰林院侍讀學士詳於殉節錄因與陳桂堂太

守廷慶於墓上建碑亭栽松柏又於墳西半里福成庵側建

祠兼祀夏忠節公允彝及忠節子節愍公完淳王君勝時澧

蓋忠節與公同社同難節愍為公高等弟子勝時亦公弟子

難後收葬故一併附之并約同人此後每歲春秋致祭以垂

不朽又屬何書田秀才其偉與趙惠蒼汝霖莊純川師洛兩

貢生重為搜採詩文刻之同時嘉興朱孝廉宅亦刻公集乞

先生敘之又於金山徐氏得所藏安雅堂文集若干卷於是

公之祠墓詩文燦然顯於世矣十一月八十生辰吳穀人祭

酒為先生撰啓徵詩吳越士大夫擊舟來祝者數日不絕得

詩百餘首而京城及遠方寄詩來祝者亦眾四川布政使楊

君荔裳知先生病目寄空青石先生笑曰日本陽光陽盡則

暗此豈可以藥物挽回者試之卒不效先是先生以六十年

來師友所贈詩文手自甄錄名湖海詩傳共六百餘家至冬

刻就又嘗讀宋元人詞集有竹垞太史詞綜所未採者撰續

補人二卷竹垞曾選明詞未竟踵成十二卷又選 國朝詞

綜四十八卷至是皆刻竣先生自中歲窮經凡讀諸家注釋

疏義有所得輒書而藏之題為羣經揭藥共十數冊自戊午

至是六年雖往來杭州太倉常居於臥游軒故終以名其集

焉

九年甲子八十一歲神氣更衰因思今古詩文中惟陸放翁
朱竹垞兩先生年逾八十尙能吟咏其餘則否因遂輟筆不
爲蓋欲幾於心齋而坐忘也遠方來訪者迎送不能出廳是
年鮑覺生中允典試河南得董益廣等七十一人錢曉徵少
詹汪敬箴庶子史誦芬沈安成靖先後逝實有山陽之慟焉
而荔裳方伯卒於成都尤爲惋惜五月間雨水泛溢禾苗漂
沒者十之三四幸蒙 蠲賑兼施窮黎稍濟然猶有食糠粒
者

十年乙丑八十二歲二月英煦齋侍郎與同年二十餘人郵
寄八十壽文極爲宏麗先生杜門已久而忠裕公祠落成仰
其節義文章不敢以衰耗自解乃於清明前親往致祭曉徵
少詹卜兆有期同人偕其兄東壁求撰墓志先生以六十年

舊好作二千言存歿之感溢於楮墨時鐵公治亭由山東巡
撫總督兩江巡洋閱兵貽書問訊伊墨卿太守由惠州罷復
起用隨鐵公來亦承其勤拳記憶也伯元中丞丁憂歸儀徵
秦公小峴自廣東調浙江布政使許公秋巖由江西按察調
浙江會運使英侍郎鮑中允常以書素見貽而席編修趙
司馬懷玉陳徵士鱣吳秀才騫姚上舍椿及桂堂遠春時時
過訪吳江潘明經翁錢塘吳秀才引年與映濬同人皆在書
舍老病中不憂寂寞也是年英侍郎充會試總裁官得胡敬
等二百三十三人孫平叔爾準鄧菽原傳安孫子瀟原相徐
直卿頌皆中式直卿以第二人及第授編修平叔子瀟選庶
吉士菽原以知縣用十一月金石萃編一百六十卷刊成
十一年丙寅八十三歲元旦得鄧太守夢琴書寄示麗澤講

習一冊并以甲子鄉試重赴鹿鳴賦詩見寄三月許周生來
乞其尊人春巖方伯墓志四月徐直卿編修亦以求撰其尊
人詩集序來訪何夢華相繼至劇談終日五月十三日微瘧
三日而愈二十一日寒熱復發由是飲食漸減至六月初三
日朱潘二君偕來問疾猶與論易隨卦嚮晦冥息義極精微
初六日病愈甚先生知不能起因言吾通籍以來四十餘年
受恩深重未酬萬一遂口授謝恩表令肇和繕寫副本
呈請當事審定轉奏次及喪事悉遵朱子家禮無務世俗浮
華之費至墓志神道須阮伯元秦小峴兩君撰之又曰汝庶
母侍吾垂三十年曾典贊其所有簪珥以充刻書之費今特
湯藥浹旬不稍懈我歿後汝宜以禮事之頃之溢然
初七日丑時也



